



新畫山脈圖志

ル 5
3546
6



門 5
號 3546
卷 6

新疆山脈圖志卷六



新城王樹枏

又東曰喀爾之嶺

新疆圖說喀爾達坂在精河城北一百七十里為

中俄分界三十三號牌博北為俄七河省屬

案中俄分界圖約作喀拉達坂為塔界第一俄

國三十四號牌博自喀爾起至哈巴爾阿素嶺

止共立牌博二十一處

又東北曰巴爾魯克之山其木多松檜巴爾魯克水出

山脈六

陶

盧

馬西流入於俄境

西域圖志巴爾魯克鄂拉在布爾哈齊淖爾東北一百五十里爲塔爾巴哈台之西屏綽諾布拉克發源西北麓踰山接哈薩克境乾隆三十一年秩於祀典每歲春秋致祭西域水道記巴爾魯克亦鎮山也在塔爾巴哈台城南二百里

新疆圖說巴爾魯克山在塔爾巴哈台城南二百四十里山南所出之水曰科別水東流八十五里不流曰烏從布拉克南流六十餘里不流曰土布林布拉克南流三十五里不流曰烏蘭可董水東

南流五十里不流山西所出之水曰巴爾魯克水西流五十里至四十一號牌博入俄境曰額勒格圖水西流六十里至四十二號牌博入俄境曰察罕托海水西北流八十里至四十三號牌博入俄境

塔爾巴哈台鄉土志巴爾魯克山在城西南三百六十里盤結起頂聳拔青霄袤延百餘里松檜陰翳豐草綠縟向爲額魯特游牧地光緒九年中俄分界約文第二條載巴爾魯克山額敕河南之地暫行借給俄屬哈薩克居住十年限滿歸還至十

九年中俄會議界務俄人違限弗還其明年伊塔

道英林新滿營右翼協領忠瑞等據約力爭卒得

收還此山蒙哈游牧於今為盛

伊稜將軍長庚收回巴爾魯克山疏云俄國前派領登往巴爾魯克山遷徙俄屬哈薩克據稱山內哈薩克業已全數遷回惟餘額勒河南岸種地哈薩克尚未遷移等語不料柏領事七月二十一日抵塔爾巴哈台後意存翻案揚言德林辦理錯誤非再展十年不可及與晤會詞意狡展欲將寶領事領登往來照會概置不理經英林等備文照會以俄屬哈薩克業已遷竣條約收地限期迫近應會同查勘交界牌博領事於八月初十日覆文大畧言英林等欲動搖兩國和好條約所載十年限滿本有另行商辦之語仍欲從新商辦令俄民復在該山游牧又於十一日晤稱七月間中國哈薩克頭目瑪木爾伯克等送俄國越界馬兵四名毆打細縛遊示牧境有辱伊國體面請傳案質審已報俄國總督外部向總理衙門理論並稱該山哈薩克尚未遷完經英林等逐層駁詰告以屆期如有留住山內不會遷回之人中國即照同治三年人隨地歸之約併山收管領事始登時色沮英林隨又備文以條約原為堅和好而設不可不遵蓋印公文原為存作信據無論本官及接任之人不得改議寶德林自四月間商辦起祇因中屬蒙哈無地安插至六月初三日寶領事始覆准遷民還山不得謂為不會

商辦現在山已騰空若到九月初三日中國即將該山並山內留住哈薩克收管係照條約及前領事來文之意辦理請其詳查往來全案公文照會去後復派員告以徒爭無益柏領事始復准照約於九月初三日交還該山惟稱俄國遷回哈薩克內尚有數百戶浮住界上入冬嚴寒將不保守牲畜請念兩國和好准令暫於巴爾魯克山內過冬指給不大地方寬讓不多時候等語詞意極為懇切英林等當查領事門首時有哈薩克數十人環求借地知領事實有為難之處若盡拂其情恐其不肯安心交山轉致事機中變當經照復領事允為請示辦理以安其心柏領事始於九月初一日將巴爾魯克山一帶俄卡全行撤回富勒銘額隨即派撥弁兵於該山沿邊舊日卡倫處所分紮六卡並飭蒙叟即於初三日移牧進山其山內留存哈薩克六百餘戶亦准領事造具人隨地歸冊籍送交中國管轄英林等當與領事商立交收該山文約無如柏領事為俄哈所迫頓改以前借地過冬明春交還之議必欲展借至光緒二十七年為止經英林等極力拒絕始定加展一年共借二年領事方電告俄國總督而俄督仍以為期太少領事又復求加一年共借三年臣長庚當以領事既為俄哈所迫勢不能盡拂其情以致債事惟念中國重在收地俄國重在得人必於約內載明限滿後俄哈不能遷徙即照同治三年人隨地歸之約統歸中國管轄庶限滿後可執此作為收地之券俄督果慮及限滿後俄哈無地遷徙致以俄民與人因此借地之議亦作罷論臣等伏查巴爾魯克山西面毘連俄界袤延寬廣南面緊逼精河有俯瞰之勢西南與察哈爾游牧之博羅塔拉接壤為伊塔兩城卡倫要道東南

山麓接連瑪利山直抵奎屯河北岸過奎屯河即達庫爾喀喇烏蘇迤西之固爾圖沿奎屯河東下即達庫爾喀喇烏蘇迤北之小草湖東北直抵塔城東南之老風口驛道僅四十里該山踞伊塔庫精四界之間若骨鯁在喉固爾圖老風口庫爾喀喇烏蘇精河皆為伊塔兩城後路要道庫爾喀喇烏蘇尤為新疆省城西面緊要屏蔽該山木茂草肥泉甘土沃自借給俄國久為俄屬哈薩克盤踞蕃滋生息俄人坐享其利一旦有事彼則因利乘便頭頭是道我則形勢隔處受敵近年北路搶劫之案層見疊出皆由該山而來該山一日不收伊塔後路一日不靖失地利擾行旅斷後路危疆域為害甚大是以前接辦塔爾巴哈台參贊大臣已故伊犁副都統額爾慶圖奏請索回上年夏間總理各國事務衙門因俄使有再借十年之請一面據約駁斥一面函令長庚派員與俄領事商辦伏念俄人之所甚欲於巴爾魯克山者在重歛該山哈薩克之賦稅查同治三年所訂條約有地面分在何國人丁即隨地歸為何國管轄之語今我索還該山應告知俄官十年限期屆滿該國當速為遷民還地否則限滿後中國即照同治三年人隨地歸之約將該處哈薩克併山收管迫以遷人以為還地張本復函商總理衙門亦謂為然當派伊塔道英林前赴塔城令與領事商辦俄領事寶德林方以十年之借踞為已有意欲久假不歸幸賴英林圖瓦強阿等爭持數月竭力索討扼定人隨地歸之約告以限滿併山收管寶德林始肯就範甫允交還該領事遽爾身故柏勒滿繼之以異常狡展幾至中變致有借地過冬之請復經多方磋磨亦賴堅持人隨地歸之約俄督不願再借得以全山收回從此伊

卒塔爾巴哈台聲氣始通精河庫爾喀喇烏蘇亦免俄人錯處之逼新
疆西面無虞伊塔後路轉輸亦可無阻實於邊疆大局裨益不小 長

將軍奏稿英林稟稱巴爾魯克山形勢東西短南

北長山南支麓與枚利山接連中有曠野東北自

老風口東南接薩斯布魯貝塔一帶長二百餘里

寬百餘里數十里不等在巴爾魯克山之東雅瑪

圖枚利諸山之西兩山之間諸水錯出間有高原

小阜而地勢平行草色葱蘢一望無際布魯貝塔

迤南十里布倫布拉克地方緊扼山口尤為形勝

之區如將塔爾巴哈台額魯特遊牧領隊大臣移

設此處洵屬相宜由布倫布拉克北至塔爾巴哈

台四百餘里南至伊犁之博羅塔拉大營盤亦四百餘里由營南行百四十里卽入伊犁大路以上各站薪草俱便間有石徑犖确坡路欹斜之處稍加修理車輛亦可暢行臣查巴爾魯克山踞伊犁塔爾巴哈台庫爾喀喇烏蘇精河四界之間形勢險要水草豐美從前額魯特牧於斯山號爲巴爾魯克部巴爾魯克者譯言樹木叢密也其爲關外沃壤載籍可徵今幸將全山收回其山西面綿亘七八百里處處與俄境毘連亟宜未雨綢繆以固吾圉英林勘定之布倫布拉克地方尙屬適中扼

要擬卽將塔爾巴哈台之額魯特遊牧領隊大臣移設布倫布拉克並將伊犁察哈爾營領隊大臣查照光緒十九年奏案出駐博羅塔拉庶彼此聯爲一氣平時足資控馭有警互爲聲援是新疆西北隱隱增一重鎮而伊犁塔爾巴哈台後路皆可恃以無虞矣

案巴爾魯克山西流之水有三今人無稱綽諾布拉克者當卽察罕托海之變音也長將軍疏稱巴爾魯克山袤延寬廣形勢險要其東北老風口有關塔城餉道西南大河沿有關伊犁餉

道而精河庫爾喀喇烏蘇等處均以此山為藩
籬擬將額魯特游牧領隊大臣移設此山與博
羅塔拉相為犄角而策其後者狃於便安卒成
畫餅殊可惜也

又東北曰固哲爾德之山固爾圖河水出焉西北流入
於額敏河

西域水道記固爾圖河發自塔城東南二百餘里
之郭哲爾德山諺云高吉登山西北流經沙喇呼
魯蘇軍臺北今作沙爾
霍羅斯又西北經固爾圖地為固爾圖
河又西北入於錫伯圖河又西流逕城南百里是

為額敏河額敏者回語清淨平安之謂音轉為額

密爾

塔爾巴哈台鄉土志巴爾魯克山東北層峯疊嶂
為沙拉布古奇山固哲爾德山在城東南三百
六十里其尾北與高吉墩相聯為蒙哈各部游牧
散帳之處

案高吉登高吉墩即今之噶吉爾敦在塔城東
南二百七十里其音轉為固哲爾德山以地名
也

又東北曰額依賓之山額敏之水出焉西北流注於古

爾格淖爾

塔爾巴哈台鄉土志額依賓山在城東三百餘里發脈賽里山迤西經察罕鄂博向西南趨至毛海柯凌及鄂勒克綽爾山今蒙人皆謂之額依賓山毛海柯凌一名莫該可列設有防卡鄂勒克綽爾一作鄂爾和楚準語山峯高聳之謂距城二百里西域釋地鄂勒霍楚爾山距綏靖城東二百餘里茂海柯凌山城東二百餘里

案西域圖志云鄂爾和楚克鄂拉在巴爾魯克東北四百里自此東北行一百五十里與朱爾

庫朱鄂拉相接其南行一支入沙磧者爲薩里鄂拉色伯蘇台鄂拉鄂爾和楚克卽鄂勒霍綽爾也此與毛海柯凌同爲額依賓之支山洪圖作鄂爾霍楚克一作鄂勒克綽鄉土志云賽里山西南隅爲阿和賽爾山鄂勒克綽爾山兩山西尾交處爲高吉墩高吉墩卽噶吉爾敦其臺在塔城東南二百七十里額敏河之南額敏者卽額依賓之捷音也西域水道記云額敏河源出塔城東二百七十餘里之鄂爾和楚克山鄂爾和楚克今人統呼爲額依賓山蓋二而一者

也西域圖志不言額敏河之所自出而載鄂爾和楚克所出之水曰布隆郭勒發源北麓達木郭勒烘郭爾布拉克發源南麓皆與今水異名案達木當卽納木河然其水實東南流入艾拉克淖爾與圖志河流方向不合蓋水名變淆久矣

又東北曰賽里之山于浣烏拉斯特水出其陰哈布托幹烏拉生水出其陽

西域圖志薩里鄂拉在鄂爾和楚克鄂拉東一百里南臨沙磧西域水道記阿勒坦山西南八百餘

里曰賽爾山

新疆圖說薩里山亦名賽里在塔爾巴哈台城東四百五十里塔爾巴哈台鄉土志賽里山一名薩里山亦名薩爾山

西域釋地賽里山在塔城東北八百餘里層巒疊嶽周二百里有奇賽里山之陽名和博克薩里距城六百餘里準噶爾未滅時此其游牧入版圖後乾隆三十六年始畀北路三旂吐爾扈特布延圖親王駐之西域水道記云納林喀喇山之東爲阿勒坦烏梁海種人山之西爲和博克薩里吐爾扈

特種人會典輿圖有和博河薩里山是爲二地今和博克薩里呼爲一處相沿已久蓋地名隨時改易也連峯疊嶂高插雲霄絕頂冰雪四時凝結山之中腰勢如斬斷兩崖萬仞中夾一徑可通山陰山南平川卽和博克薩里舊吐爾扈特親王府在焉

按賽里準語謂馬股山形似之中俄分界自阿爾泰山起至賽里山止爲北路所立牌博據新疆圖說哈布托幹烏拉生水之外尙有和洛土得可水阿里札圖水皆出賽里山陽平地泉穴

之中南流二三十里不流

又東北曰納林喀喇之山額爾齊斯河自其北過之

西域水道記納林喀喇爲噶勒札爾巴什淖爾

亦作

赫薩爾巴什淖爾

北岸山車布登傳云乾隆二十一年和託輝

特逆賊青衮咱卜叛車布登將以兵會參贊塔爾

瑪善赴烏蘭嶺追剿阿睦爾撒納未至遽由納林

喀喇歸牧卽其山也

塔爾巴哈台山其上多獺塔爾巴哈台之水出焉

西域圖志塔爾巴哈台鄂拉在朱爾庫朱鄂拉西北一百里山脈相屬爲準境北屏山有特里特額

達巴尤稱險隘乾隆三十一年秩於祀典每歲春秋致祭案自此西南行爲鄂爾和楚克鄂拉其脈自博羅塔拉北山東行至此始合

西域水道記塔爾巴哈台城者名以山也山在城北百里乾隆二十二年官兵追巴雅爾五月二十四日至塔爾巴哈台山後極險處奇徹布截賊去路羅卜藏多爾濟等從東攻入奪險五處夜半巴雅爾遁官兵追之至愛古斯兩路搜尋六月初二日海蘭察追及之巴雅爾引弓欲射海蘭察射中其肘占頗圖射中其頸乃被擒凡十有餘日巴雅

爾繞行塔爾巴哈台山三次蓋比之三周華不注矣

塔爾巴哈台鄉土志城之南北皆山東繞西合控帶四維其最近翼蔽城垣而嚴限中外者惟塔爾巴哈台一山準語塔爾巴哈獺也地多獺故名新疆識略云塔爾巴哈台城東北二百餘里有珠爾呼珠山毛海柯凌山又城北七十里有烏里雅蘇圖山考北境一帶大山東與賽里山相接西至阿雅古斯河即愛古斯河及巴爾喀什淖爾之處橫亘千餘里今蒙人統名之曰塔爾巴哈台山巖然高聳前

斜後削天險自成光緒九年中俄分界議以此山
嶺爲限水向西北注者爲俄境水向東南流者爲
中國地綏靖城在其南誠北方屏障也

案塔爾巴哈台所出之水曰特里色勒水南流
四十里止於地喀喇奇塔特水南流四十里至
五十一號中俄分界牌博入塔城境曰布爾汗
可水東流四十里至五十三號中俄分界牌博
入塔城境新疆圖說云塔爾巴哈台山在城東
北七十五里原名珠爾呼珠山非也

烏里雅蘇圖山

新疆識略烏里雅蘇圖山在塔爾巴哈台城北七
十里東北三十里至楚呼楚山根

楚呼楚山楚呼楚水出焉南流入於額敏河
西域水道記西域初定雅爾與塔爾巴哈台兩處
同駐兵乾隆三十一年參贊阿公桂奏言雅爾之
地向來雪大而牧場遙遠近城所有地畝不敷五
百兵丁耕種悉心查勘得塔爾巴哈台山陽鄂畢
特之舊游牧地曰楚呼楚田土膏腴水亦充足牧
馬之處旣不甚遠毋庸動移卡座地方形勢亦頗
佳勝請將雅爾城移於楚呼楚於是建綏靖城楚

呼楚山在塔爾巴哈台山東南一百里楚呼楚水
南流經城西來匯於額敏河

西域釋地塔爾巴哈台舊為準噶爾北境本為楚
呼楚後定今名

案鄂畢特今作滿畢特楚呼楚山以地名在額
敏河北

錫伯圖山錫伯圖水出焉南流入額敏河

案錫伯圖山西距塔爾巴哈台城一百里其下
有卡倫

塔伯圖山阿布達爾之水出焉西流入於額敏河

案塔伯圖山在錫伯圖山西

素瓦素嶺

案素瓦素一作蘇瓦素為中俄分界第五十號
牌博

哈巴爾阿素嶺

案哈巴爾阿素一作哈巴爾烏蘇為中俄分界
第五十四號牌博是為塔界第二十一處

巴克圖山巴克圖水出焉南流入於額敏河

西域水道記巴克圖水二支東支發自巴克圖山
西支發自烏蘭嶺南流數十里右匯哈屯河又折

而東南流六十餘里至巴克圖卡倫南東支水自
卡倫東來滙同西南流六十里經瑪尼圖卡倫西
入額敏河巴克圖山在塔爾巴哈台城西七十里
其歲祭文曰嵯峨設險奠崇基於月窟以西磅礴
鍾靈分大幹於天山之北通往來於諸部棧接梯
連壯形勢於殊方峯層嶂疊編修曹仁虎所擬詞
也

西域釋地巴克圖山綏靖城西四十里
新疆圖說塔爾巴哈台西至巴克圖山四十五里
與俄屬葦塘子連界

塔爾巴哈台鄉土志城西七十里為巴克圖山秩
於祀典有告祭歲祭文

案巴克圖山為中俄分界第四十八號牌博
珠爾呼珠山

西域圖志朱爾庫朱鄂拉在烘和圖淖爾西南八
十里山脈自必濟鄂拉北古爾畢達巴南分支西
出走青告勒河北額爾齊斯河南六百餘里折而
西北行四百里至此北路羣山之次高者山北有
水東南流滙為小澤乾隆二十年大兵進討準噶
爾遣官告祭案阿勒坦鄂拉西南羣山縈絡而朱

爾庫朱鄂拉厥名較著處烘和圖淖爾之西南唐書葛邏祿部跨僕固振水包多怛嶺僕固振水爲今烘和圖淖爾則多怛嶺應於此山爲近是矣

案新疆識略珠爾呼珠山在塔城東二百餘里珠爾呼珠卽朱爾庫朱譯者異文耳

阿和賽爾山

塔爾巴哈台鄉土志賽里山西南隅爲阿和賽爾山鄂勒克綽爾山兩山西尾交處爲高吉墩地氣高寒風勢狂大

白嶺察罕河水出焉西北流入於額敏河

案白嶺在鄂勒霍綽爾山西南

可可哈毛爾嶺

案可可哈毛爾嶺在白嶺之西噶吉爾敦臺之東

沙拉布古奇山

塔爾巴哈台鄉土志沙拉布古奇山在城東南二百五十里

阿里雅瑪圖山其陰阿里雅瑪圖之水出焉

塔爾巴哈台鄉土志阿里雅瑪圖山在城東南三百五十里

案阿里雅瑪圖山在巴爾魯克山東其支峯也
山北所出之水曰阿里雅瑪圖水曰排吾起水
皆北流四十里分溉屯田

莫多巴爾魯克山莫多巴爾魯克水出焉西流出卡
入於俄境

案莫多巴爾魯克山在巴爾魯克山南亦其支
峯也其水西流五十里至四十號牌博入俄境
其卡在塔爾巴哈台城南二百八十五里

札婁勒山

案札婁勒山在莫多巴爾魯克卡南為中俄界

三十七三十八三十九號牌博亦巴爾魯克山
支峯也

瑪立山有水焉東北流止於地

案瑪立山在札婁勒山東南科別台南烏宗布

拉克台東烏宗布拉克台距城四百六十里亦巴爾魯克山支峯新

疆圖說云庫庫托羅海水阿克塔斯水流僅得
隆水萌古隆水皆出瑪立山陽東北流數十里
不流

格德蘇山雅瑪圖水出焉

新疆識略格德蘇山在塔爾巴哈台城南三百餘

里

案格德蘇山在瑪立山東雅瑪圖卡西西北距塔城三百五十里亦巴爾魯克山支峯

綽羅布圖勒山

新疆識略格德蘇山迤東有綽諾庫圖勒山

案綽諾庫圖勒即綽羅布圖勒在瑪立山東南

夏拉托羅海山

案夏拉托羅海山在綽羅布圖勒山東北

拉古山坤都倫水烏吐布拉克水出焉

案拉古山在夏拉托羅海山東北坤都倫軍臺

之南東北距塔城四百八十餘里新疆圖說云

坤都倫水北流三十里不流烏吐布拉克水西

流五十里不流

白同哈拉山

案白同哈拉山在拉古山東沙爾札克軍臺西

南說爾噶其河之南多蘭圖山之支峯也

蘇海圖山

案蘇海圖山在覺隴烏蘇淖爾之西達爾達木

圖河之南喀圖山之支峯也

青石峽其中多石油

案青石峽西北距城六百餘里在蘇海圖山南與綏來交界其地產石油質極稠濃曬則成塊鎔墊火輪軌道堅而耐久提煉得法亦五洲之大利也

博古圖山博古圖水出焉有獸狀如馬騾鬃驢尾千百其羣土人謂之野馬

案博古圖山在青石峽之西齋爾山之南南與庫爾喀喇烏蘇交界

齋爾山其北蘇爾圖之水出焉東流入於納木河其東達爾達木圖之水出焉東南流伏於戈壁

新疆圖說齋爾山在塔爾巴哈台城東南四百二十里山北之水曰蘇爾圖河東北流五十餘里經鐵廠北又東流一百七十餘里經西二工金廠山北與納木河會山東之水曰達爾達木圖河東南流經金廠南又東流一百里伏於戈壁
塔爾巴哈台鄉土志齋爾山距城三百餘里蒙古游牧記塔爾巴哈台東南地方也漢爲匈奴右地鄧支單于居此魏爲烏孫地元魏爲高車地周隋爲突厥地唐爲三葛邏祿部地廣饒水草舊爲準噶爾阿克巴等五集寨游牧之所乾隆二十四年

大兵進剿五集寨宰桑達什策陵等以其地內附
攷齋爾山亦名載里山自塔城東南金廠往西至
巴爾魯克一帶蜿蜒五百餘里一脈聯貫近日分
為兩大山自南路軍臺以東為齋爾山以西為巴
爾魯克山哈布圖山多蘭圖山皆齋爾山支峯也
喀圖山其木多樺楊其鑛多金其獸多彪虎黃熊善
搏人有鳥焉小而善鳴土人呼之為幾回醉酒良憂
爾圖之水出焉南流伏於戈壁

塔爾巴哈台鄉土志喀圖山即哈布圖山亦名達

爾達木圖山哈圖即阿騰之轉音阿爾泰又
阿騰之轉音均譯言金山也在城東南五百

餘里塔城鐵廠煤窰均在齋爾山之陰金廠則在

哈圖山之陽山南縱橫百里舊金廠十處四處居本山
東南北三隅

餘俱散布於
各岡阜中良憂爾圖河源出其南蘇爾圖河源出其

北均向東南流山之陰峯迴路轉清流映帶樺楊

雜生奇石挺秀東南與齋爾山相對峙其間自西

徂東岡巒澗壑錯綜紛歧袤延二百餘里截然止

於大磧迤南一帶小山碁列或散布或銜接皆石

壁瘦峭地云不毛再南則戈壁一望無際矣

案新疆圖說哈布水合佳爾太水均出哈布圖

山南流伏於戈壁合佳爾太即良憂爾圖之異

譯蘇爾圖水則出齋爾山與今鄉土志異蓋齋爾喀圖皆相連之山也塔城東北諸山皆有金山之名菁華早露者惟哈圖山爲最縱橫百餘里碁布星羅苗綫皆自西而東或伏或顯或聚或分寬狹淺深俱無一定有亂如髮絲縱橫交插者有蜿蜒盤曲忽上忽下者有細而漸大而漸無者有鑽透成沙積各石層下者以上層而言皆銜結青色堅硬石層之中故名石鑛與沙鑛不同其原則一鑛學家謂石鑛本沙鑛之母自透露地面經數千年熱漲寒縮風斤雨帚

夾沙下流或積於河底或埋於沙下其可淘洗而得者是謂沙金沙金者工省而易若石鑛則凝結於堅頑包孕於密邃採之者非攻去其石莫由而獲鑛非一層水非一道縋幽鑿險工費繁鉅往往資少器笨半途輒廢因此下層諸鑛均未宣洩此非有大力者不能任之也哈圖山金鑛自新疆拓闢以來內地商民聚此開挖者幾數萬人舊有十廠曰蘭州灣曰新蘭州灣曰東新興工曰西新興工曰老南工曰老東工曰察罕阿騰曰馬拉水曰車路溝曰札工各處顏

垣敗井斷瓦破窳目其遺址勢若大鎮追詢十
廠始末無知之者惟札工開辦最後咸豐初年
有關內商民劉光和卞極明等五大股聚此開
鑿公舉劉光和爲首號金頭跟苗追鑿五年而
小效又四年而大贏嗣鑿至旺地適值甲子回
亂塔城戒嚴劉光和等率礦夫往援而哈民乘
機剽掠因棄礦遠逃年久洞水積九十餘丈繼
往作者去水無方坐是以廢光緒二十三年俄
商涎之請於撫臣饒公應祺撫臣不欲外人專
其利疏請華俄合辦公置機碾於二十五年興

工新開之井一無所得惟運碾舊年棄礦五年
之久虧折二十四萬餘金其工遂輟二十九年
撫臣潘效蘇念廠舍機碾之廢壞也復立寶新
公司招集股本改爲官督商辦委縣丞施再萌
董其役仍運碾先年棄礦三年復折二萬餘金
而其役遂又中輟時三十三年事也然前此所
採皆屬上巖其下巖菁英固未嘗一洩也而取
之較上巖爲尤難夫深山寶藏原以待生民之
取用彼造物者豈嘗有所恪惜矜祕而故示人
以難哉然從來珍奇所在莫不蘊匿於寂壑窮

崖冰天雪窟之中而工重役苦瘴厲毒惡人當
之而病畜觸之而瘖又復路險途長糗糧難繼
無泰西鐵軌汽車之利泰西礦地靡不特設鐵軌
用達通衢饋資糧通商販而一切
浣火紙布擦膠機件油錁煉金鋸水炸藥之細
無一非以重直購自外人而司其事者又不免
於侵冒此所以求者千百而獲者僅一二也
木同鄂博山說爾噶其河之水出焉南流伏於戈壁
案木同鄂博山在齋爾山西亦其支峯也新疆
圖說云說爾噶其河亦名烏土水南匯胡吉爾
台諸水流一百二十餘里伏於戈壁

多蘭圖山其北多蘭圖諸水出焉其西哈拉阿圖諸
水出焉

案多蘭圖山在木同鄂博山西雅瑪圖軍臺東
新疆圖說云多蘭圖水拜興圖水出山北均北
流入於沙磧哈拉阿圖水阿拉克改水下洛改
布拉克水出山西均西北流四十里不流

哈屯山
新疆圖說哈屯山在塔爾巴哈台城東南六百
里

塔爾巴哈台鄉土志哈屯山在土爾扈特霍伯

克河即和博克南岸山脈由鄂勒克綽爾山折而東

趨三百餘里皆謂之哈屯山

素滾嶺

案素滾嶺在哈屯山東為哈屯山支峯素滾達

坂臺北距烏蘭布拉克臺八十里

賽勒克山

案賽勒克山在布霍圖臺之南亦哈屯支峯日

本圖作色爾克山

仙里克山

案仙里克小山也在賽勒克山東

阿拉特山

案阿拉特山在仙里克山東其南即莪洛素托

小海子

雅嶺

案雅嶺在素滾嶺東

雪里克山雪里杆特布拉克水出焉南流三十里止

於地

案雪里克山在雅嶺東南

庫克申倉山其上產煤質軟而無煙宜烘爐

塔爾巴哈台鄉土志庫克申倉距城七百餘里半

山半水石中含蚌蚘甚多博物家言茲山係上古

海島

又塔城東南四百餘里之白楊河口即納木河兩岸產煤左右礪石
灰石泥片石逐層間隔泥片石中含有木植枝節紋捲栢又含有
扁面蛤類此屬水族呼石燕指為禽類非也距煤層上二十餘丈之山坡
其灰石間含木植亦如捲栢有大至合抱身長數丈者有如荏菴幹大盈握
者礦學家謂見此知
下有煤層無疑矣

案庫克申倉在雪里克山東南自哈屯以下諸

山至此皆在和博克賽里河南納木河北

巴音菊羅坤山

案巴音菊羅坤山在巴音鄂博圖臺南

博依倫山博依倫水出焉南流入於和博克賽里河

案博依倫山在巴音菊羅坤山東烏圖布拉克

臺西南

巴憂阿拉憂凌圖山

案巴憂阿拉憂凌圖山在博依倫山南

咸鄂洛倫山咸鄂洛倫水出焉

案咸鄂洛倫山在巴憂阿拉憂凌圖山東南

阿拉憂凌圖山

塔爾巴哈台鄉土志阿拉憂凌圖山距城七百餘

里

案阿拉憂凌圖山在咸鄂洛倫山南

得林山

案得林山在阿拉曼凌圖山東南塔城鄉土志云薩勒布爾山又東爲疊林山距城九百餘里疊林卽得林也

薩勒布爾山

塔爾巴哈台鄉土志阿拉曼凌圖山迤邐東行百餘里突兀高起三百餘丈爲薩勒布爾山距城八百餘里

案薩勒布爾山在咸鄂洛倫山東鄂蘭布拉克臺東南

哈根哈拉山

案哈根哈拉山在薩勒布爾山東與科布多界再南爲哈布塔曼圖哈拉小山巴音山均東與科布多界自巴音菊羅坤諸山至此皆在和博克賽里河之東

穆司島嶺

案穆司島在賽里山西南爲塔城北段至阿爾泰山中俄分界第一牌博洪圖作穆斯套嶺鄉土志作木斯陶山土爾扈特呼曰郭爾板察斯土

色伯蘇台山

西域圖志色伯蘇台鄂拉在納林和博克東北十
里山脈自鄂爾和楚克鄂拉分支東南行百餘里
至此又南行入於沙磧

塔挖梗山

塔爾巴哈台鄉土志賽里山西北為木斯陶山塔
拉痕山東南為阿騰烏魯山崔巍聳峙皆賽里之
支峯也

案塔挖梗山在穆斯烏嶺東北塔拉痕即塔挖
梗之變音也

白登哈拉山

案白登哈拉小山在塔挖梗山東其下有小泊
出水北流入額爾齊斯河

老汗山

案老汗山在塔挖梗山北察爾齊海臺南
臺距行營六百七十里

哈斯塔勒山

案哈斯塔勒山一作陶斯圖山在老汗山北額
爾齊斯河南

庫克辛山

西域水道記庫克辛山者禡木特之所游牧因以

名其部故馮木特傳云馮木特厄魯特人號庫克辛蓋猶塔爾巴哈台之厄魯特牧於巴爾魯克山謂爲巴爾魯克部矣或曰庫克辛者老也故以別宰桑馮木特

案庫克辛洪圖作濶克孫亦作空紳在哈斯塔勒山東南納林河經其東卻羅圖水經其西

阿合孔山

案阿合孔山在老汗山東北額爾齊斯河南洪圖作諾海山

芍隴山

案芍隴山在阿合孔山東南庫克辛山西南日本圖作月倫山

可登山

案可登山在空紳山東額爾齊斯河南已上塔爾巴哈台境內支山

又東北曰古爾畢之嶺哈喇圖水出焉西南流入於額爾齊斯河

西域圖志古爾畢達巴在額爾齊斯河東北哈喇圖郭勒發源西麓山脈自鎮西府東北境之必濟鄂拉西北行二百餘里至此崗萃特拔其支山西

出走哈喇額爾齊斯郭勒哈喇圖郭勒之間

一統志古爾畢嶺在塔爾巴哈台極東境山脈自鎮西之必濟山西北行二百餘里爲全境屏障

案古爾畢嶺西南與納林喀喇諸山相接其脈實自伊犁塔城蜿蜒而東特其山分支四出迴環糾繞故言山脈者各據一說也

又西北曰庫爾圖之嶺哈喇額爾齊斯之水出焉西南流入於額爾齊斯河

西域圖志庫爾圖達巴在古爾畢達巴西北一百里山脈相屬哈喇額爾齊斯郭勒發源西麓其支

山西出走哈喇額爾齊斯郭勒奇喇郭勒之間

西域水道記喀喇額爾齊斯河出庫爾圖嶺南流百里左會一水復西南流五十餘里與華額爾齊斯河會二水以黃黑異稱

又西北曰烏可克之嶺

西域圖志烏可克達巴在阿勒坦鄂拉東

又西北曰阿爾台之山是山也周數百里東望喀爾喀西望準噶爾部南望烏魯木齊連峰沓嶂盛夏積雪不消其樹多松檜其藥多野參獸多貂狐狍獐鹿之屬其陰多銀鉛多黃金阿爾台之水出焉其中多鱒鯊之

魚

西遊錄明年

已卯也是為元太祖十四年

大舉西伐道過金山

元史玉哇失傳

諸王和林及失刺等叛追至金山北邊備對曰金山隋唐間突厥阿史那氏得古匈奴之地居金山之陽按湛然居士集卷一有過金山詩

方盛夏雪凝冰積斲冰為道

西遊記載邱詩云雪嶺界天人不到冰池耀日目難觀原注人

云向此冰池之問觀看則魂識昏昧

松檜參天花草彌谷

邱處機金山詩云參天松如筆管直森森動有

百餘尺萬株相倚鬱蒼蒼一鳥不鳴空寂寂

金山而西水皆西流入海其南有

回鶻城名別石把有唐碑所謂瀚海軍

西遊記曰北庭端府景龍三年

楊何大都護有德政有龍興西寺二石刻在功德煥然可觀西域傳補注云金滿縣又改後庭縣北庭都護治也元於別失八里立北庭都元帥府亦治於斯故城在今保惠城二十餘里地曰護堡子破城有唐金滿縣殘碑

西遊記七月九日同宣使西南行五六日屢見山

上有雪又三二日歷一山高峯如削松杉鬱茂而有海子南出大硤則一水西流雜木叢映于水之陽韭茂如芳草夾道連數十里北有故城曰曷刺肖西南過沙場二十里許水草極少始見回紇決渠灌麥又五六月踰嶺而南至蒙古營宿拂廬旦行迤邐南山望之有雪郵人告曰此雪山北是田鎮海八刺喝孫也八喇喝孫漢語為城中有倉廩故又呼曰倉頭七月二十五日有漢民工匠絡繹來迎又有章宗二妃曰徒單氏曰夾谷氏及漢公主母欽聖夫人袁氏號泣相迎翌日阿不罕山北

鎮海來謁日前有大山高峻廣澤阻陷非車行地
宜減車從輕騎以進用其言以二車蒙古驛騎二
十餘傍大山西行宣使劉公鎮海相公又百騎李
家奴鎮海從者也因曰前此山下精截我腦後髮
我甚恐鎮海亦云乃滿國王亦會在此為山精所
惑食以佳饌師默而不答西南約行三日復東南
過大山經大碛中秋日抵金山東北少駐復南行
其山高深谷長坂車不可行三太子出軍始闢
其路乃命百騎挽繩縣轅以上縛輪以下約行四
程連度五嶺南出山前臨河止泊從官連幕為營

因水草便以待鋪牛驛騎數日乃行有詩云金山
南面大河流河曲盤桓賞素秋秋水暮天山月上
清吟獨嘯夜光毬金山雖大不孤高四面長挖拽

脚牢橫截山天心腹樹干雲蔽日競呼號

桐鄉程同文釋曰阿不罕

山在金山東北今阿集爾罕山也鎮海傳太祖命屯田於阿魯歡立鎮海城阿魯歡者亦即阿集爾罕山也長春由此西行傍大山者即傍阿爾泰山之東大幹今烏蘭古木中過青吉斯海子之北乃向西南行當取道於今科布多再西南乃科布多阿額爾齊斯河發源之處阿爾泰最高之脊所謂東南過大山經大碛抵金山者當謂此 渡河而南前經小山石雜五色其旁草

木不生首尾七十里復有二紅山當路又三十里
鹹鹵地中有一小沙井因駐程挹水為食傍有青
草多為羊馬踐履宣使與鎮海議曰此地最難行

處前至白骨甸地皆黑石約行二百餘里達沙陀
北邊頗有水草更涉大沙陀百餘里東西廣袤不
知其幾千里及回紇城方得水草遇天晴晝行人
馬往往困斃惟暮起夜度可過日暮遂行牛乏皆
道棄之馭以六馬自爾不復用牛矣

西域圖志阿勒坦鄂拉舊音阿爾泰爲古金山在
庫爾圖達巴西北三百里哈柳圖郭勒發源西南

麓

西域水道記作哈流圖河云發自庫
克烏嚕木嶺西南流入宰桑淖爾北

山脈自庫爾圖達巴屈

折至此其迤東境峰巒層沓亘數百里爲北路名
山之冠東爲舊藩喀爾喀蒙古諸部西爲準噶爾

部乾隆二十年大兵討準噶爾道出阿勒坦鄂拉
遣官祭告北魏蠕蠕傳那蓋出自金山累有勝捷
國人咸以那蓋爲天所助乃殺豆崙母子那蓋襲
位號候其伏代庫者可汗自稱太安元年子伏圖
立號他汗可汗伏圖西征高車爲高車王所殺子
醜奴立禽其王殺之盡併叛者國遂強盛隋書突
厥傳姓阿史那氏後魏太武滅沮渠氏阿史那以
五百家奔茹茹世居金山工于鐵作金山狀如兜
鍪俗呼兜鍪爲突厥因以爲號西突厥大邏便強
盛東距都斤西越金山唐書突厥傳車鼻亦阿史

那族而突利部人也頡利敗薛延陀稱可汗乃往
歸焉延陀將殺之乃遯去竄金山之北自稱乙注
車鼻可汗西葛邏祿北結骨皆並統之延陀後衰
車鼻勢益張右驍衛郎將高侃擊之攻阿息山追
至金山獲之景雲中葛邏祿胡屋鼠尼施三姓大
漠都督特進朱斯陰山都督謀落旬雞元池都督
蹋實力胡鼻率衆內附詔處其衆于金山回鶻傳
薛延陀乙失鉢爲野啞可汗在金山者西役葉護
可汗乙失鉢孫夷男率其部稍東保都尉撻山獨
邏水之陰東室韋西金山南突厥北瀚海接蒙古

語謂金爲阿勒坦與阿爾泰山相近更以方位考
之阿勒坦鄂拉卽古金山無疑也蠕蠕主那蓋西
出金山而立國應在今阿勒坦鄂拉之西更以高
車傳彌俄特與伏圖戰於蒲類海北之文証之則
自阿勒坦鄂拉西南迄天山之北皆其境壤突厥
世居金山因兜鍪之狀以爲國號而邏便越金山
之西車鼻竄金山之北皆以金山爲望鎮者至葛
邏祿三姓本處金山西境因其內附徙衆居之薛
延陀乙失鉢未遷之前本處金山西南是以西役
葉護至夷男東徙乃與回紇均以金山爲西界焉

一統志阿爾泰山在特思河西北綿亙二千餘里
高入霄漢盛夏積雪不消爲西北諸山之祖其頂
在烏普薩池西北支峰蔓壑分爲四支正北一支
隨厄爾齊斯河以北至鄂羅斯國其東北一支繞
特思河之北千里東爲湯努山又東北接杭愛山
之陰北抵色楞格河其河東一支謂額爾齊斯河之東爲烏蘭郭
馬山繞奇勒稽思泊之北又東南爲白勒奇那克
科山又東爲石奇山空格衣河出其南麓烏海河
出其東北麓又北爲馬喇噶山布勒噶蘇台河出
其東麓又東北爲大山喀喇河諸水出其南麓其

南一支蜿蜒不斷納憐河呼勒秦河哈流圖河納
思克河布勒濟河哈巴河奇蘭河喀喇額勒齊思
河俱出其西麓哈勒奇薩河阿普都河出其東麓
山勢旋折而東布顏圖河出其北麓布拉青吉托
河札克台河出其南麓又東爲阿爾泰山之尾又
東南復分二支如黑雲二道界瀚海中其東爲庫
克西勒克山又東北接巴顏山其南支爲都特嶺
布帶山圖古克里河出其西麓又南爲布勒堪山
空鄂洛阿濟爾罕山層峰不斷千餘里橫截沙漠
爲阿爾班阿岳爾達察嶺又東南爲古爾板賽漢

山其南爲諾默渾山其東南爲五百根山至空可
喀喇龍山而止自空鄂洛阿濟爾罕山南向爲奇
齊格納山拜轟鄂爾山查喇圖山至伊塔特圖山
而止

西域水道記準語謂金山爲阿勒坦山舊對音爲
阿爾泰又作阿爾台西界烏梁海北界喀爾喀屯
田官廠東界喀爾喀在科布多城南山頂極四十
八度七分西二十二度二分其尾極四十六度五
分西二十度四分元時太宗之孫昔里吉脫忽海
都分地多在金山元史土土哈傳至元十五年大

軍北征率欽察驍騎千人以從追失烈吉踰金山
擒札忽台等以獻二十九年略地至金山獲海都
之戶三千餘劉哈喇八都魯傳昔里吉叛宗王別
里鐵木兒奉命往征帝諭哈喇八都魯從行師次
金山有使者云自脫忽王所來願得一見王以爲
信左右曰詐也脫忽所居要害殆與昔里吉爲耳
且願勿聽遣兵窺之脫忽方飲酣進擊大敗之因
獲昔里吉所遣使知其不爲備乘勢進擊大破擒
之玉哇失傳成宗在潛邸帝以海都連年犯邊命
出鎮金山月赤察兒傳金山南北叛王海都篤哇

據之不歸正朔垂五十年時入爲寇大德十年叛
王滅里鐵木兒等屯金山武宗帥師出其不意先
踰金山月赤察兒以諸軍繼往月赤察兒奏曰諸
王禿苦滅本懷攜貳而察八兒遊兵近境叛黨素
無悛心臣以爲昔者篤哇先衆請和雖死宜安撫
其子欵徹又諸部旣已歸順宜處諸降人於金山
之陽吾軍屯田金山之北按昔里吉者憲宗子脫
忽者滅里大王之子海都者合失之子皆太宗孫
脫忽分地在金山而爲昔里吉耳目是昔里吉分
地在金山西也宗室世系表無篤哇之名而海都

篤哇分據金山南北疑篤哇卽脫忽特宗室表脫
忽子無欵徹耳海都子察八兒遊兵金山近境則
海都分地亦近金山矣山西南八百餘里曰賽爾
山山北百數十里爲額敏河

從軍雜記阿爾泰山譯曰金山或云卽古金山極
高峻八月雪齊馬腹定邊左副將軍喀爾喀王策
令遣兵七千以十一月度阿爾泰越二千里至額
爾起斯準噶爾部衆遁去乞降者數百帳
魏源兩征厄魯特記阿爾泰卽唐史所謂金山也
高入雲霄三垂斗絕爲西北諸山大宗其北支循

額爾齊斯入鄂羅斯其南支一則橫截大漠一則
東走杭愛山即古燕然山爲回紇牙帳及元之和林歷代
漠北建庭之所自康熙用兵修攘恢復增三音諾
顏部而準夷不敢南牧蓋地利形勢使然哉
還讀齋雜述光緒七年夏五月收還伊犁其年秋
七月金順請敕科布多幫辦大臣額爾慶額就近
會同俄官將西北邊界薩烏爾嶺奎峒山等處詳
細履勘照約畫界科布多參贊大臣清安旋會奏
科境遊牧沃壤前已分讓俄人十分之六蒙民僅
存烏梁海所屬哈巴河阿勒泰山一帶就牧營生

復有哈薩克人眾擁擠生計日蹙若將哈巴河再
行分割則蒙哈部落必至無可容身且前定之界
已建牌博豈宜另有勘改金順寄到地圖所繪奎
峒山黑伊爾特什河薩烏爾嶺等處與新舊圖說
核對不符其名曰奎峒山者或係科屬阿勒泰山
此山綿亘數千里形勢巍然科塔兩城倚爲屏障
俄人巧爲含混意圖據高臨下扼我長區名曰黑
伊爾特什河者或係科屬額爾吉斯河此河順流
而下逕逼俄境且達黑龍江彼若佔據以通運道
最爲便捷一有緩急兵可衝波而至名曰薩烏爾

嶺者或係塔屬霍博克賽里山此山爲塔城門戶
與科界唇齒相依若分割歸俄不惟科塔隔絕必
有覬覦瑪納斯古城之勢彼若聯絡吐魯番與南
八城首尾相應卽伊犁烏魯木齊東路亦斷矣請
敕下廷臣妥議得旨就原圖應勘分處力與指
辨酌定新界恭親王等奏約內聲明應自奎峒山
過黑伊爾特什河至薩烏爾嶺畫一直綫由分界
大臣就此直綫於舊界間酌定新界是此段界趾
顯有出入之處履勘議分關係非淺上令升泰
馳赴科布多與清安額爾慶額會商金順辦理惟

科塔之界原繪圖綫出入甚大升泰等前乘俄使
未到將山川形勢預爲查明旋與額爾慶額面晤
俄官巴卜闊福撤伏策福等悉心商酌俄人欲照
圖中直綫以哈巴河畫界升泰等力爲指辯俄使
理屈詞窮始允退離哈巴河迤西約八十餘里至
畢里克河定界畢里克係小河原圖並未繪列若
照此劃分則俄佔哈巴河上遊約二百餘里我僅
三分之一道里遠近仍失其平卽與原約相悖復
商就俄國按西洋算法計之由舊界至哈巴河直
綫止共二百八十餘里折中議分以昭公允又由

山脈六
新界北首起順至西南薩烏爾嶺穆斯島冰山共
長五百八十餘里均核與圖綫相符升泰遂於七
月中旬起程過額爾齊斯河南勘分塔界額爾慶
額亦徑赴科屬新界與俄官丈量里數照新定綫
道劃分其豎立牌博處兼埋暗記令久遠有考旋
便道察看舊界牌博細勘奎峒山地據形勝與阿
勒泰山腹背相連爲中外關鍵力與指辯得移至
阿克哈巴河源爲界奎峒山仍歸中土
長將軍奏稿阿勒台山卽古金山蒙古謂金爲阿
勒坦舊譯爲阿爾台道光年釐定山爲阿爾台山

山後之諾爾爲阿勒坦諾爾以歸畫一茲山高入
霄漢雪積不消支峰蔓壑分爲四支東北自山後
之奎屯鄂拉起接連賽留格木嶺迤邐東北分爲
二枝一爲烏里雅蘇台北境唐努山一爲中俄分
界之薩彥山由莎車龜嶺轉向東南以迄恰克圖
六七千里爲中外之大防東南一枝爲固爾圖嶺
索勒畢嶺科布多迤南軍臺所經各嶺暨巴里坤
東北之阿濟山蜿蜒東趨橫帶瀚海中起伏不斷
爲喀爾喀西路南境其長三四千里西行一枝爲
薩爾塔爾巴哈台山庫爾楚木山抵額爾齊斯河

山脈六
岸壁立如門硤名貝克河向東北劈硤而過其西北之山名喀爾賓山入俄境阿勒台山前後物產饒裕水草豐美久爲中外各部落所豔羨嘉慶道光年間科塔兩城先後移撤卡倫將夏季展設邊卡之地委爲哈薩克常年遊牧之區不知哈薩克能至之地俄羅斯亦即能至故咸豐十年議立中俄界約旣以常駐卡倫爲界而光緒七年復以前此訂明界趾不爰另議勘改蓋見我阿爾台山無人管理彼卽伺隙而入蠶食漸進至今未饜所欲昔春秋時莒子曰僻陋在夷其誰以我爲虞巫臣

對曰夫狡焉思啟封疆以利社稷者何國蔑有今阿勒台山地方旣已定議交還科布多收管故臣首以防守事宜爲請恐一置度外後將補救無及終不免有慢藏誨盜之虞但不統論西北全局無以見茲山關繫之重不叅觀已往陳迹無以見今日辦事之宜謹擬阿勒台山應設官經理之處約舉數端一曰固疆域初四衛拉特分牧於天山之北阿勒台山之南部自爲長和碩特駐烏魯木齊準噶爾駐伊犁杜爾伯特駐額爾齊斯土爾扈特駐雅爾 國朝自康熙年用兵準部以來皆分西

北爲兩路平定後於伊犁設將軍烏魯木齊設都
統塔爾巴哈台設參贊大臣獨於額爾齊斯未曾
設官以其地原屬北路彼時亦無人奏請故也所
惜者烏梁海地曠人稀哈薩克屢次潛入致啟俄
人窺伺於咸豐十年乘我北京有事請自沙濱達
巴哈起直至齋桑諾爾以常駐卡倫爲界同治三
年遂將阿勒台山後阿勒坦諾爾烏梁海部千餘
里可耕可牧之地並科布多烏科克卡倫以西喀
屯河源布克圖爾瑪河源及山前之齋桑諾爾迤
西愛古斯各哈薩克牧地亦千餘里占去迨同治

九年建立塔城界牌時俄人又將察罕鄂博界牌
建於中國界內侵入百餘里致將塔爾巴哈台赴
阿勒台山之路截斷光緒七年訂約謂同治三年
所訂齋桑湖迤東之界不妥請由兩國特派大臣
勘改又將我齋桑諾爾全湖並阿拉克別克河西
蒙哈各遊牧地占去彼於山後哈屯河等處採金
喀屯河發源於阿勒台山後喀屯斯克別勒克依
山溝溝內產金兼產水晶並松杉大木俄人取作
船料遊獵者捕貂狐獾狍之屬歲獲鹿茸尤多光
緒八年分界後俄人於齋桑南岸中國舊設瑪呢

圖噶圖勒干卡倫之地曾加修濬以作口岸齋桑
諾爾產魚業漁者常數百戶由齋桑諾爾順額爾
齊河北行經俄國斜米省城至托波利省爲彼國
極便水路其輪船溯額爾齊斯河而上直達阿勒
台山前且於山梁後沁達垓圖舊卡地方設兵駐
守從此以西順布克圖爾瑪河中國卡倫舊道以
抵彼國所設之布哈塔爾敏斯克沿途設站並於
昌吉斯台舊卡西南設立阿勒台斯克俯瞰山前
尤爲我之要害額爾齊斯河由齋桑諾爾洩出北
流其西來會之布昆河爲塔爾巴哈台舊設卡倫

之地俄人於彼採金其東來會之布克圖爾瑪河
發源於沁達垓圖舊卡沿河爲科布多設卡舊地
及其北烏利巴河俱產銀鉛各礦俄人甲船載至
斜米等處鎔鍊每歲秋夏運鑛之船幾四十號其
由山後各處運出之木料皮張松子蜂蜜等物爲
數亦巨是我阿勒台山後之利悉已爲其所奪而
俄人議論措置其注意尤在山前光緒二十三年
俄署使巴布羅福照會總理衙門請由阿拉克伯
克河邁喀普察蓋等處貿易現在俄人於齋桑斯
克設立行棧兩處之路業已走熟二十六年三月

塔爾巴哈台叅贊大臣春滿電稱俄人請於布倫
托海捕魚當經電覆阻止上年冬臣至阿勒台山
據駐哈巴河章京延年面稱二十六年八月俄人
曾用輪船載有礮位由額爾齊斯河溯流而上駛
至哈巴河口謂來捕魚經延年阻回去冬科布多
叅贊大臣瑞洵奏稱俄今力爭阿拉克別克河克
色勒烏雍克地方卽爲他日要索阿勒台山張本
揆此情形若不早籌防守恐狃糠及米則我之疆
域受損日以益甚此應設官經理者一也一日修
守備光緒四年前塔爾巴哈台叅贊大臣錫綸奏

稱額爾齊斯河之在俄境如中國之有黃河與江
而其源出於我阿勒台山陽承化寺東南百數十
里之固爾圖嶺諸大山中俄人之所以必欲覬覦
阿勒台山者恐中國有王濬樓船之事光緒六年
又奏稱阿勒台山據額爾齊斯河上游爲俄人所
必爭山陽柯林河布爾津河哈巴河諸水西南流
入額爾齊斯河皆可灌溉屯田之語臣於光緒十
二年密陳西北邊情亦曾奏明阿勒台山爲漠北
全疆右臂額爾齊斯河出其南西北流入齋桑諾
爾復西北流入俄境達北海其山體勢尊崇泉甘

土沃我據之可以制俄俄據之可以害我者也布倫托海在其南三百里由布倫托海東南行十三站可達古城今中俄分界已至薩烏爾嶺去布倫托海甚近若一旦有事俄人由布倫托海南下一至古城則伊犁烏魯木齊隔絕在西新疆全局皆震若阿勒台山設兵防守或復布倫托海舊治則東於科布多之邊防可固西於塔爾巴哈台之東路可以無虞南可以遮蔽烏魯木齊全境光緒十七年前甘肅學政胡景桂條陳新疆邊防善後事宜亦請於布倫托海設官屯墾奉旨飭令臣與

楊昌濬陶模會商妥議臣議以布倫托海本科布多屬地如將科布多幫辦大臣移於布倫托海駐紮就近防守阿勒台山較爲有益嗣經科布多叅贊大臣魁福覆稱鉅款難籌擬俟塔城借地交還將蒙哈安插妥協後再行會議奏辦上年現任科布多叅贊大臣瑞洵奏稱阿勒台山在古爲著名腴區在今爲彼族几肉我不亟謀守禦終必拱手讓人臣前於光緒二十三年譯閱俄書見俄人於托波利地方製造兵船截至光緒十九年已造就大輪兵船一百零二隻尋常大兵船二百隻現在

西北利亞鐵道業已修成鄂穆斯克總督斜米巡撫均扼駐額爾齊斯河岸又於阿勒台山迤西之烏斯奇喀綿諾果爾地方築有礮臺設有礮隊馬兵齋桑斯克亦有礮臺駐喀撒克馬兵一營步兵八百七十五人上年冬索倫營總管札拉豐阿稱濟木乃邊卡附近之肯德里克河及哈巴河源察那噶圖地方住有俄民均係卡兵期滿留於邊境發給牛種令其耕種遞年加增以備有事時人人皆可爲兵之語是錫綸所謂王濬樓船之事彼早有準備而我於彼南下之途尙無規畫徹桑未雨

之謀勢難再緩此應設官經理者二也一曰重巡防查舊章每歲夏季塔爾巴哈台於齋桑諾爾西北置輝邁喇呼卡倫於額爾齊斯河西科布多置霍呢邁拉扈卡倫於額爾齊斯河東冬季科布多於齋桑諾爾東南置瑪呢圖噶圖勒干卡倫於額爾齊斯河北岸塔爾巴哈台置瑪呢圖噶圖勒干卡倫於額爾齊斯河南岸交相望理藩院則例不准哈薩克潛入烏梁海遊牧地方並責成卡倫官員不時嚴查道光十八年烏里雅蘇台將軍保昌等奏請移庫倫幫辦大臣駐科布多爲科布多

山脈六
幫辦大臣並經奏定每歲春秋二季科布多叅贊
幫辦大臣前往霍呢邁拉扈及馬呢圖葛圖勒干
卡倫會同塔爾巴哈台查卡倫大臣巡查哈薩克
二次道光二十三年復經奏准每年添派烏梁海
散秩大臣一員自遊牧內搜查至瑪呢圖噶圖勒
干與各委員會哨一次叅贊大臣等隔年輪查以
紓蒙古兵力當年原定章程不爲不密只因日久
懈生巡邊事務因之廢弛今與強俄爲鄰迥非昔
比力圖補救尤在得人此應設官經理者三也一
曰輯哈部哈薩克爲漢康居國其部有三曰左部

右部西部哈薩克源流內載一百九十四鄂托克
亂後隸塔城者尙三十三種其中有會投俄平定
後陸續來歸者有附逆爲亂於光緒七年業經奉
旨免罪者有曾被俄誘始終不肯外附者種類既
殊良莠亦異現住阿勒台山之柯勒依哈薩克係
右部王阿卜勒必斯第六子庫庫岱所屬部落原
日牧地冬季在塔爾巴哈台所屬齋桑諾爾東南
俄棟河東岸夏季在塔爾巴哈台所屬齋桑諾爾
西北布昆河西岸皆與阿勒台山毗連僅隔額爾
齊斯一河其冬日所住俄棟河之東岸又緊與額

爾齊斯河南岸瑪呢圖噶圖勒干地方相接同治三年新疆回匪變亂正值前烏里雅蘇台將軍明誼奉旨會同塔城叅贊明緒與俄官會議中俄界務之際議定地面分在何國其人丁卽隨地歸爲何國管轄定約時烏魯木齊等城已失塔城於明誼去後卽變維時各部哈薩克大半歸俄惟庫庫岱之子阿吉不願歸俄管轄東徙阿勒台山陽一帶住牧約束部衆不准附逆爲亂俄人誘以官職衣服亦矢志不從同治五年棍噶札勒參在青格里河立營阿吉率領部衆捐助羊一萬隻馬一

千匹同治七年棍噶札勒參安插額魯特人衆並收撫布倫托海亂民又捐助馬一千匹羊二萬隻前科布多叅贊大臣奎昌會同俄官建立科塔兩城界牌前署伊犁將軍榮某帶兵西進均經幫助蒙古支應台站前將軍金順進攻古牧地阿吉之子哈生木罕孫巴達爾罕台吉鄂斯滿頭目朱爾圖拜等十三員率其部衆捐健駝一千隻解送到營經金順於光緒三年六月具奏在案哈薩克俗剽人悍獨阿吉一部人稱恭順彼旣喁喁嚮義我卽早應給以牧地以獎忠順而資觀感但伊犁境

內現在實無隙地可容前經臣奏明哈薩克等住
科布多境內者歸科城管轄住塔爾巴哈台境內
者歸塔城管轄已欽奉 諭旨允准在案目下辦
理安插卽已需人將來常年約束亦非有人經理
不可如額爾慶額前經誤收之哈薩克雜居各蒙
部中占據水草終難相安不若乘此收回借地之
時將山嶺以東哈衆悉數移置山西不令再行東
趨以免闌入喀部致滋貽患此固宜於安插時卽
應一律辦理妥協者也至於常時事務繁多如俄
商在蒙哈各部貿易及各國遊歷之人任意在深

山僻徑行走最易滋生事端而俄屬哈薩克在俄
境盜竊逃入中國境內藏匿並中屬之哈薩克出
邊盜竊仍復潛回藏匿均屬常有之事若非設官
查拿懲辦匪徒無以斂跡商旅亦無人保護至若
中俄哈部牧地相接每因芻牧相爭與夫俄商貿
易賒欠興訟者皆就近赴愬於齋桑斯克之俄官
以致政權漸爲俄官所移而俄官袒其所屬剖斷
不公中屬哈薩克頗爲受屈亦非常年設官管理
不能兩得其平此應設官經理者四也論者未悉
地勢謂塔城新疆皆可兼顧不知科布多在阿勒

台山東承化寺在阿勒台山西中隔烏西哩大嶺
雪峰巍峻每歲惟六七月馬行十日能至承化寺
餘則必須遶由沙札蓋軍台非二十日不能達塔
城至哈巴河十四站哈巴河至承化寺六站亦須
二十日始能至而隔於察罕鄂博之俄卡平時尙
須假道於俄方能行走一值有事卽有扼吭之阻
遶由南道愈形迂遠新疆隔於沙山戈壁東西橫
亙千餘里無水無草遶由古城綬來行走其迂遠
亦與科塔相等此科塔新疆均有難以兼顧之實
就塔城情形而論孤懸西北堅逼強鄰西面與俄

接壤僅四十里而其地又平曠無險可守其疆域
自東北以迄西南兩面受敵北面山嶺距城僅數
十里嶺之上卽俄境嶺之後盡俄屬哈薩克屬集
之區倘一有事副都統所轄官兵僅一千四百餘
以之固守本處尤恐不足若再分兵兼顧千五百
里以外之阿勒台山誠恐力有未逮况俄國之齋
桑斯克距阿勒台山之哈巴河僅百數十里而俄
國之斜米省距齋桑亦七日可至無事則已若或
有事恐塔城與阿勒台山同時受兵則更可慮至
於科布多有關喀爾喀西境邊防叅贊大臣等均

山脈六
駐阿勒台山又恐有顧此失彼之虞查科布多幫辦大臣原因巡查哈薩克而設今若移駐於阿勒台山地方管理蒙古哈薩事務似與原案相符阿勒台山之陽地實廣沃額爾齊斯河據俄上游阿拉克別克河爲河北門戶濟木乃爲河南門戶由濟木乃至布倫托海平坦無阻承化寺與布倫托海南北相值自承化寺東南行至宿海圖由宿海圖踰岡西南地勢高敞可以遙見薩里山陰之哈普托蓋一帶川面迤邐西南漸就平陸奇蘭河自東北而西南繞流其前克木奇克河自西北來會

同入額爾齊斯河其地土脈肥潤林木叢茂二水中間似可擇建治之地其南有巴勒巴海小山如案額爾齊斯河環繞其外西望俄境則我所據之地雄壯可資控馭河南德爾班津草場豐美再南爲噶勒札爾巴什諾爾東南卽爲布倫托海地勢低下揆度全局應以額爾齊斯爲總要提綱之地彼以輪船仰流而上我據上游亦得高屋建瓴之勢如值有事額爾齊斯可以翼蔽布倫托海布倫托海不能兼顧額爾齊斯且哈巴河濟木乃均在下游指揮拒禦事事皆便再三審度應以控河爲

是哈巴河爲額爾齊斯河北關繫緊要之處濟木
乃地方較哈巴河關繫尤重一統志載阿勒台山
烏梁海部西南界由巴噶諾爾起至噶勒札爾巴
什諾爾北岸納林哈拉山止與塔爾巴哈台所屬
土爾扈特連界再由納林哈拉山起至碑爾素克
託羅垓止與塔爾巴哈台連界其地蓋屬塔城轄
境防守之道宜由科布多塔爾巴哈台叅贊大臣
會商辦理濟木乃迤東六七十里哈布托蓋地方
宜於屯田其東北百餘里之哈勒奇荻地方有小
山可據有沃壤可屯百人之食如於該處擇地開

墾以屯代防並設馬隊百餘騎幫同濟木乃防守
比拉扣暨哈喇烏蘇等處鄂博之地兼可巡查薩
里山陰各隘口與哈巴河防營聯絡一氣互相犄
角以扼濟木乃東通布倫托海之路較爲得力布
倫托海東爲科布多軍台大路兼達古城西與塔
爾巴哈台接壤兼通綏來四路衝要且爲額爾齊
斯河北大臣駐所援應之地宜設馬隊以重後路
其西北地勢空虛易於受敵惟有噶勒札爾巴什
諾爾與巴噶諾爾兩巨浸尙可藉爲阻隔必應防
護於外始能屏蔽乎內而諾爾西岸卽屬塔境又

山脈六
無應行紮兵之地僅西北角有納林哈喇山尙可扼守其山環抱諾爾西北中有流泉草亦暢茂如於其地駐紮馬隊巡查額爾齊斯迤南庫克辛山迤北可以固恰勒奇菱後路之防並於諾爾北面之穆呼爾岱東北之沙拉呼魯素及諾爾西北與塔爾巴哈台接界之烏圖布拉克阿瑞一帶擇地各設卡倫巡查諾爾西北兩面之路無事資以察捕盜賊一遇有警藉資守望又巴噶諾爾迤南有通古城僻徑均應由布倫托海設卡撥兵防守以免奸宄私越布爾津河爲哈巴河之後路霍木河

有通科布多要道爲大臣駐所西北藩籬額爾齊斯河北岸渡口並南岸往來必經之德爾班津一切布置均應酌度情形奏明辦理濟木乃東面恰勒奇菱迤南數十里之却羅圖與山南之哈喇噶圖兩處地方爲薩里山南北山口其地在塔城所轄霍博克薩里境內由此南入新疆綏來縣境內爲直捷如能將塔城原駐哈巴河官兵改駐此兩處以固霍博克薩里北面門戶於塔城新疆均有裨益總之阿爾台山之防前於光緒十五年棍噶札勒參遷徙之後卽應籌辦今已逾十有餘年不

宜再緩該處爲西北形勢扼要所在果能彌縫其闕則西北固而東南力紓有裨於全局者實匪細也

案阿爾台山舊隸科布多山陽牧地久爲塔爾巴哈台借據虞芮爭田相持不決者數十年至光緒三十一年而歸地之議始定自是阿爾台山專歸科布多並設專官經理不復再隸塔城然天山北幹由伊犁東南分趨西北折而東下繞博羅塔拉之背出額爾齊斯齋桑淖爾而結成阿爾台大山魏源所謂西北諸山之祖是也

且茲山綿亙二千餘里形勢巍然爲漠北大防康熙雍正兩朝兩次出師北路皆以阿爾台爲駐軍之處前分界大臣額爾慶額曾細勘奎峒山地據形勝與阿爾泰山腹背相連爲中外關鍵力與俄官指辯得移至阿克哈巴河源爲界奎峒山仍歸中土扼其險要是此山得失關繫新疆全局不但天山北幹首尾完具已也至於境內支山則皆略而不書以示限制云

山脈志卷六終

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

蘇五兩障西出嶺北流皆以河爾台

